

## **I Sulat Febe Pol di dad To Ftoo di ku Dyisas di Ifisu**

<sup>1</sup> Do, Pol, gumdà i sulat ani, satu dek Krayst Dyisas mdà di knayè i Dwata. Na febegu i sulat ani di gamu dad to nfun Dwata mnè di Ifisu, dunan i dad to gsalig du mdà di ta ksatatuyu ku Krayst Dyisas. <sup>2</sup> Yé kayègu moon Dwata Mà na i Amuto Dyisas Krayst mlé gamu kafye na ktanak nawa.

### *I kafye gfunto fagu di ksatatuto di ku Krayst*

<sup>3</sup> Fasalamat ato di Dwata, i Mà Amuto Dyisas Krayst, du blén di gito mdà di langit i kdee gamfye di kaftooto du mdà di ta ksatatuto ku Krayst. <sup>4</sup> Di laman là mimò i klamang banwe, ta sanan ato nalék du nfunan ato fagu di ksatatuto di ku Krayst du fye too ato tluh, na landè gumaslento di kanfen.

Na mdà di kalbong nawan gito, <sup>5</sup> ta falan fnè di fandaman i kafbalingan gito dad ngàan fagu di ku Dyisas Krayst du yé gulehewan na knayèan. <sup>6</sup> Na tooto dnayan i Dwata du tadèan ato banlé kafye fagun di ku Dyisas Krayst, i Ngàan toon kanbong nawa. <sup>7</sup> Fagu di litè Krayst, ta nsò Dwata ato, na ta fnasinsyan dad salàto. Too bong kafye Dwata <sup>8</sup> i ta blén gito, landè gamsngad dun.

Di kdee kfulungan na kgadèan, <sup>9</sup> nimò Dwata i ta fnaleh nawan, na fiten di gito i knayèan nimò fagu di ku Krayst i là lmenan fgadè di munan. <sup>10</sup> Ani fnaleh nawan i dnohòan ku ta kel i du, dunan

sansatun i kdee ta nimòan di langit na di tah tanà, na Krayst ulu di kdee.

<sup>11</sup> I kdee fnaleh nawan, slame mgimòan. Na ta nalék Dwata ato du fye nimòan ato dad ngàan fagu di ksasatuto di ku Dyisas Krayst, du yé ta fnaleh nawan mdà di kagatbùan. <sup>12</sup> Dunan ayé i nimòan. Taman, gami ta muna smalig di ku Krayst, toomi dnayen i kdatah Dwata.

<sup>13</sup> Na lê salngad ayé gamu dad to ise Dyu du ta lê gamu mbaling dad to Dwata. Di kaklingeyu i glut tdò, dunan i Fye Tulen mlé gamu kagalwà, ta fantooyu. Na yé ilè dun gamu ta nfun Dwata du ta blén di gamu i Mtiu Tulus, dunan i ta fakan-gan. <sup>14</sup> Du yé funa blé Dwata di gito i Tulusan, yé gugmadèto dun gdawatto kadang i kdee fakang Dwata di dad ton, na fagu déé gadèto too sikof kafalwà Dwata i dad nfunan. Taman, tooto dnayen i kdatahan.

### *I dasal Pol*

<sup>15</sup> Yé duenam man, mdà di muna kaklingegu gablà di kaftooyu di Amuto Dyisas na i kalbong nawayu di kdee dad to nfun Dwata, <sup>16</sup> là ti fanak agu fasalamat di Dwata gablà di gamu, na galta gamu fakuf di kat kdasalgu. <sup>17</sup> Na mni agu di Dwata i Amuto Dyisas Krayst, dunan i Mào too mdatah. Ani fnigu, blén di gamu i Mtiu Tulus, dunan i mlé gamu kfulung na faglabat gamu i Dwata du fye midul i kdilèyu dun. <sup>18</sup> Na lêgu fni lanwan i fandamyu fye glabatyu nun fandenyu mdà di katlon gamu, dunan i kdee kafye ta fakan-gan di kdee dad to ftoo di ku Dyisas. <sup>19</sup> Na yé duen-gu lê mni ayé du fye galyaloyu kgis i kaltulus

Dwata lamyak di gito dad to ftoo di kenen. I kaltulus ta dini di gito, dunan <sup>20</sup> i gnamitan di ktékan ku Krayst di fati na di kafsudengan kenen di kwananan ditù di langit. <sup>21</sup> Mdatah Krayst di kdee hari, na di dad ganlal, na di dad tulus\*, na di dad amu, na di kdee dagit, ise ku lo di mduni, bay kel di fulé du kadang. <sup>22</sup> Na ta fdanà Dwata i kalbong kdee di ku Krayst, na ta fagotan dun i kdee, na kenen ulu i kdee dad to ftoo. <sup>23</sup> Na gito dad to ftoo di ku Dyisas Krayst, ta mgimò lawehan, na déé gumite dun i ksikofan, na kenen smikof kalbong kdee.

## 2

### *I ktékto di fati magin ku Krayst*

<sup>1</sup> Di munan, salngad gamu di dad to ta mati du landè kasgagoty du Dwata mdà di ksasèyu, na di dad salàyu. <sup>2</sup> Gamsalà gamu di munan du lalòyu ldam i dad to nfun banwe ani. Yé nimenyu Satanas, dunan i magot di bleng i langit na i tanà, na lê magot i dad to là mimen di Dwata. <sup>3</sup> Na di munan, salngad i kdeeto di dale, du yé nimòto knayè i ungad, na nimento i ibalan na i sasè fandaman. Na salngad ato di dademe dad to là mimen di Dwata, mnè tahto i kalbut Dwata.

<sup>4</sup> Bay mdà di kakdo Dwata na i kalbong nawan gito, <sup>5</sup> di lamto mnè di fati du mdà di là kimento, ta ntékan ato magin ku Krayst. Du yé duenyu galwà lo mdà di kafye Dwata. <sup>6</sup> Na mdà di ta ksatuto ku Krayst Dyisas, ta nték Dwata ato magin

---

\* **1:21** 1:21 I dad tulus, dunan dad kasaligan i Dwata na i dad busaw.

di kenen, na ta fsudengan ato di saféd Krayst di langit. <sup>7</sup> Nimòan ayé du fiten kel di landè sen i too bong kafyen ta fgadèan di gito fagu di ku Krayst Dyisas. <sup>8</sup> Du mdà di kafye Dwata ta galwà gamu fagu di kaftooyu, na ise ku mdà di gamu nimò bay tadè blé Dwata di gamu. <sup>9</sup> Na yé duenam man, landè to fakay fdatah i kton, du ise ku yé gumdà i kagalwàto di balù dét i ta mgimòto. <sup>10</sup> Ta fnalami Dwata ato, na di ta ksasatuto di ku Krayst Dyisas, nimòan ato i dad to mimò i fye nimò ta fala fatlagad Dwata.

### *I ksasatuto fagu di ku Dyisas Krayst*

<sup>11</sup> Gamu dad to ise Dyu, fandamyu i muna kagkahyu. Msik dad Dyu gamu, na yé katlola gamu “dad landè ilè di laweh.” Bay dale, nun fimòla ilè di lawehla. <sup>12</sup> Na fandamyu i kagkahyu di munan, du gawag gamu di ku Krayst, na là glam gamu di dad Dyu ta mgalék Dwata, na landè alelyu di kasafnè ta fakang Dwata di dad ton. Na di knèyu di tah tanà ani, fa landè fandenyu, na là ti gadèyu i Dwata. <sup>13</sup> Bay balù tagnè gamu gawag di Dwata, di nawan ani, mdà di ksasatuyu ku Krayst Dyisas, ta neben gamu di kenen fagu di litè faloh Krayst di kfatin.

<sup>14</sup> Na Krayst samfye i dad Dyu na i dad ise Dyu du ta sansatun i lwe lumbuk ani. Na ta falmon i gambleng gito, dunan gumdà i kasnang nawa dad Dyu na i dad ise Dyu. <sup>15</sup> Du yé nimò Krayst di kfatin, flandèan btas i dad uldin Dwata fagun di ku Mosis gagin i dad fimòan na i dad fnangan di dad to. Nimòan ayé du sansatun i lwe lumbuk di satu falami lumbuk mdà di ta ksasatuto di ku

Krayst, na sanfyen ato. <sup>16</sup> Fagu di kfati Krayst di krus, lanmon i kasnang nawa, na sansatun i lwe lumbuk, na sanfyen ale di Dwata. <sup>17</sup> Du Krayst, tamdò kenen di dad Dyu, dunan i dad to mdadong di Dwata, na lêan tdò i dad ise Dyu, dunan i dad to mawag di Dwata. Na yé tdòan di kdeela nun kasafye. <sup>18</sup> Du mdà di ku Krayst i kdee dad to, baling Dyu ku demen ise Dyu, fakay gafdadong di Mâ fagu di Mtiu Tulus.

<sup>19</sup> Na yé duenam man, ta ise gamu mahal to, bay ta glam gamu di dad to nfun Dwata, na ta ngà gamu i Dwata. <sup>20</sup> Na i kdee ta ftoo di ku Krayst, salngad i gumnè ta fdak i dad tugad Dwata na i dad to dek Dyisas, na Krayst Dyisas i too mabtas batu gufdak i gumnè ani. <sup>21</sup> Na fagu di ku Krayst, ta sagot i gumnè ani, na ta mgimò i gumnè Dwata too mtiu. <sup>22</sup> Na fagu di ksasatuyu di ku Dyisas Krayst, ta lê gamu sasatu di kdee ta ftoo du mgimò i gumnè Dwata, du yé ta mnè di gamu i Tulusan.

### 3

#### *I katdò Pol di dad to ise Dyu*

<sup>1</sup> Yé duenam man, do, Pol, i satu blanggù mdà di katdògu gamu dad to ise Dyu gablà di ku Krayst Dyisas. <sup>2</sup> Na gadègu sa ta lingeyu gablà di kafye Dwata di do, du blén i nimò ani di do du gamfye di gamu. <sup>3</sup> Na fite Dwata di do i là lmenan fgdè di munan, salngad i ta man-gu di gamu fagu di sulat. <sup>4</sup> Ku bnasayu i sulatgu ani, glabatyu i là lmen fgdè Dwata di munan gablà di ku Krayst. <sup>5</sup> Di munan, là tulenan ani di dad to, bay ani ta fgdèan fagu di Mtiu Tulus, na fgafatan di dad to dek Dyisas Krayst

na di dad tugad Dwata. <sup>6</sup> Na dunan ani i là lmenan fgadè di munan, gamu i dad to ise Dyu, fagu di Fye Tulen, lê gamu gagin di dad Dyu di kagfunla i blé Dwata, na sagin i kdee di satu laweh, na slame nun ael di fakang Dwata fagu di ku Krayst Dyisas.

<sup>7</sup> Mdà di kafye Dwata, ta nimòan agu snaligan tamdò i Fye Tulen mdà di gnagan ta blén do fagu di kaltulusan. <sup>8</sup> Na balù ku too agu mdanà di kdee dad to nfun Dwata, knèan ta blé Dwata di do i gnagan tamdò di dad to ise Dyu gablà di too bong kafye blé Krayst di gito. <sup>9</sup> Na lêan blé di do i gnagan fbateng di kdee dad to i tdò là lmenan fgadè di munan. I Dwata mimò i kalbong kdee, là tayòan tulen i tdò ani di munan. <sup>10</sup> Yé duen Dwata mimò ani du fye teen i dad ganlal na i dad tulus ditù di langit i kdee dad sahal gnaganan fagu di kdee dad to ftoo di ku Dyisas. <sup>11</sup> I nimò Dwata ayé saglalò di ta fnaleh nawan di là fa nimòan i kdee, na dnòhòan ayé fagu di ku Krayst Dyisas, i Amuto. <sup>12</sup> Na mdà di ksasatuto di ku Krayst, na fagu di kaftooto di kenen, là gdè ato, na là myà ato fdadong di Dwata. <sup>13</sup> Taman, ani fnigu di gamu, nangyu fagdanà i nawayu du mdà di dad kaflayamgu di katdògu gamu, du i dad kaflayam ani gamfye di gamu.

### *I kalbong nawa Krayst gito*

<sup>14</sup> Taman, yé duen-gu lkuad di Mào di langit dmasal di kenen. <sup>15</sup> Kenen gumangmà i kdee dad to ftoo ta ditù di langit, na lê man dini fa di tah tanà. <sup>16</sup> Na ani fnigu di Dwata, mdà di bong kdatahan banlén gamu kgis fagu di Tulusan, du fye mbagal i nawayu. <sup>17</sup> Ani lêgu fni, too mnè Krayst di nawayu fagu di kaftooyu. Na lêgu fni too

gamu dmalil na lamnok fagu di kalbong nawan gamu, <sup>18</sup> du fye glabatyu i kalbong nawa Krayst gamu salngad di kdee dad to i Dwata. <sup>19</sup> Mulà moon galyaloyu i kalbong nawa Krayst gamu balù là sikof kaglabatto dun, du fye too gamu fnò i ldam Dwata.

<sup>20</sup> Dnayento Dwata du fagu di kaltulusan gaganan nimò mdatah fa di fnito na di fandamto.

<sup>21</sup> Gito i dad to ftoo di ku Krayst, tooto dnayen i Dwata fagu di ksatuto di ku Krayst Dyisas mdà di muna, na kel ani, na gafat di landè sen. Amén.

## 4

### *I ksatu nawa i dad to ftoo di ku Krayst*

<sup>1</sup> Yé duen-gu blanggù du mdà di kagin-gu di nimò i Amuto. Taman, ani fnigu di gamu, fanyeyu ldamyu du yé gten nimò i dad to mgalék Dwata.

<sup>2</sup> Tooyu fdanà i ktoy, na too gamu sakdo, na tooyu fantahà nawayu. Na mdà di kasalbong nawayu, too gamu sfasinsya. <sup>3</sup> Too gamu fgal di ksatu nawa blé i Mtiu Tulus fagu di kasafye gumdà i kasbakas nawayu.

<sup>4</sup> Du gito dad to ftoo di ku Dyisas, lo satu laweh guglamto, na lo satu Tulus mnè di gito. Na mdà di kalék Dwata gito, ta lo satu fandento.

<sup>5</sup> Na lo satu Amuto, na lo satu fantooto, na lo satu duento fbunyag. <sup>6</sup> Na lo satu Dwata, dunan Mà i kdeeto, na kenen mdatah di kdee, na mnè kenen di kdeeto, na nimòan i knayèan fagu di kdeeto.

<sup>7</sup> Na kat satu di gito, ta banlé Krayst dad sahal gnagan nimò mdà di knayèan. <sup>8</sup> Du ani man i Tnalù Dwata,

“Di kbatunan di langit, dee neben dad to gtafus, na blén i dad sahal gnagan di dad to.”

<sup>9</sup> Dèt gumtatek i manan, “Mbatun kenen?” Yé kayèan man ta muna kenen tufa di tanà, na fles di gumngalaman. <sup>10</sup> I ta tufa di gumngalaman, dunan i mbatun ditù di tah langit, du fye baling di dungan ku demen di tah, déé sa kenen. <sup>11</sup> Na kenen i mlé dad sahal gnagan nimò di dad to, na mdà ayé, nun dademe mgimò dad to dek Dwata, na i dademe tugad Dwata, na i dademe tamdò i Fye Tulen, na i dademe, ulu di dad to ftoo du tamdò ale di dad simbahan. <sup>12</sup> Na yé duen Krayst mlé dad gnagan ani, du fye gatlagad i kdee dad to Dwata mimò i knayèan, na kamgis i laweh Krayst, dunan i dad to ftoo di kenen. <sup>13</sup> Na fagu déé, ta nun ksasatuto di kaftoo na di kgadèto i Ngà Dwata. Na du yé kagakah, ta mgimò ato mbagal di kaftooto, na sikof i ldamto salngad di ku Krayst.

<sup>14</sup> Na ku yé kagkahto, ta là ti salngad ato i dad malnak ngà mlal mgebe balù dèt tdò i dad to fulung famgaw. <sup>15</sup> Bay yé gito nimò, tmulen ato gagin i kaglut na kasakdo. Na fagu déé, too ato lamnok di kaftoo kel di kasalngadto di ku Krayst, dunan i Uluto. <sup>16</sup> Na mdà di ku Krayst, i kdee dad to glam di lawehan, ta too sbakas, na ta sgagot i kabal laweh fagu di kat satu alel di laweh. Na ku kat satu, nimòan i kenen alel, too lamnok i laweh, na baling too midul i kbagalan fagu di kasakdo.

### *Ifalami to*

<sup>17</sup> Na yé duenam man, fagu di dagit i Amuto, toogu man di gamu, ta nangyu ganbet i dad to là ftoo di ku Krayst du landè gukel i fandamla. <sup>18</sup> Na



kmifuh i kaglabatla. Là gfunla i falami nawa blé Dwata du landè gnadèla na magéng ulula. <sup>19</sup> Na landè kyàla, na mdà ayé, ta bléla i lawehla di sasè knibal i ungadla, na magin ale di kdee dad sahal magsik nimò. Na baling midul i kiballa mimò sasè.

<sup>20</sup> Ise yé teenyu di ku Krayst. <sup>21</sup> Bay ta lingeyu sa gablà di kenen, na di klalòyu kenen, ta gatdò di gamu i kaglut teen di ku Dyisas Krayst. <sup>22</sup> Taman, tngakyu i labi ldamyu, dunan i labi ktoy, du yé gamfalmo gamu du fibalan na fan-gawan gamu. <sup>23</sup> Na tooyu fafalami i ktoy na i fandamyu. <sup>24</sup> Yé fye teen di gamu i falami kto nimò Dwata glalò di kenen kagkah du fye teen i katluhan na i ktiun.

<sup>25</sup> Taman, ta nang gamu tmulen kéng. Yé fye, tulenyu kaglut di dademeyu ftoo, du i kdeeto glam di laweh Krayst. <sup>26</sup> Na ku malbut gamu, too gamu fgeye tàan gamu nebe di salà. Na lnifetyu i kalbutyu ayé di laman là sdaf i du, <sup>27</sup> na nangyu banlé Satanas kdalan fagsalà gamu. <sup>28</sup> I to tagne tmaku, ta nang dè tmaku, bay yé fye, talbahò du yé fye kafngabalan i klawilan, na gtabengan i dad to landè knun.

<sup>29</sup> Na nang gamu talù sasè, bay yé talùyu i fye du yé gamtabeng, na gamtgal nawa i dad to lminge gamu di balù dét klidùla. <sup>30</sup> Na nangyu flidù i Mtiu Tulus Dwata, du kenen ilè i ta kfun Dwata gamu, na i gugmadè dun snikofan i kagalwàyu kadang di fulé du. <sup>31</sup> Na tngakyu i katduk nawa, na i kalbut, na i kaflabè, na i kafaltê, na i kaslen, na i kdee dademe sasè nimò. <sup>32</sup> Fanyeyu i ldamyu di dademeyu to, na too gamu sakdo. Na too gamu sfasinsya salngad i ta kfasinsya Dwata i dad salàyu

fagu di ku Krayst.

## 5

### *I knè di gumalwan*

<sup>1</sup> Yé duenam man, tooyu ganbet i ldam Dwata du gamu i dad ngàan toon kando. <sup>2</sup> Na too gamu sakdo salngad i kakdo Krayst gito di kablén i kton di fati du mgimò dsù too fye bun gamfye nawa Dwata.

<sup>3</sup> Na du ta ngà gamu i Dwata, là gtenan linge ku nun di gamu mimò sasè knayè i lawehyu, ku demen i dademe magsik nimò, ku demen i klom.

<sup>4</sup> Na là fakay ku yé lamwà di bàyu dad magsik talù, na dad talù landè gukel, na i dad ulek magsik, du là ti gtenan. Bay yé too gten ku mlé gamu fasalamat di Dwata. <sup>5</sup> Du ta tooyu gadè, i to mimò sasè knayè i lawehan, na i to lom, landè gfunla di Kagot Krayst na di Kagot Dwata, du i to ayé salngad ku yé fnangamfùan i ise glut dwata.

<sup>6</sup> Nang gamu fagwè di sukat fagu di talù landè gukel, du i dad to mimò ayé, mnè tahla i kalbut Dwata du là nimenla dun. <sup>7</sup> Taman, niwasyu i dad to ayé. <sup>8</sup> Di munan, mnè gamu di gukmifuhan, bay ani ta mnè gamu di gumalwan fagu di ksasatuyu di Amuto, Dyisas Krayst. Taman, yé fye i ldamyu salngad di ldam i dad to mnè di gumalwan. <sup>9</sup> Du yé ulè i knè di kalwa mimò fye, tluh, na kaglut. <sup>10</sup> Na tooyu fkah di nawayu i kdee gamflehew i Amuto.

<sup>11</sup> Na nang gamu magin di dad nimò landè gukel salngad di nimò i dad to mnè di gukmifuhan, bay yé nimòyu i tluh, du fye dilèla i dad sasè nimòla.

<sup>12</sup> (Du too ti magyà, balù di lo kastulen dun gablà di sasè nimòla di gugbunin.) <sup>13</sup> Na ku ta magtuyal

i kdee di lwa, yé klom mite i kaglutan, <sup>14</sup> du i lwa fiten i kdee. Taman, ani man i Tnalù Dwata, “Mukat ge, to kudang, na mték ge, to mati, du tnuyal Krayst ge.”

<sup>15</sup> Yé duenam man, tooyu fanye mebe i ktoy, na nangyu ganbet i dad to là fulung faldam, bay yé ganbetyu i dad to fulung faldam. <sup>16</sup> Too gamu fagasleng mimò fye, du ta too midul ksasè di nawan ani. <sup>17</sup> Na mdà déé, nangyu nimò i landè gukel, bay yé fye tooyu fanngabal ku dét knayè i Amu fimò gamu. <sup>18</sup> Na nang gamu flangal du yé gamfalmo gamu, bay too gamu fafnò i Mtiu Tulus. <sup>19</sup> Na ku stulen gamu, gnamityu i dad Salmo\*, na i dademe man i Tnalù Dwata. Na too gamu lmingag mdà di nawayu i dad lingag dmayen di Amu. <sup>20</sup> Na kloyu to fasalamat di Dwata i Mào fagu di dagit i Amuto Dyisas Krayst, balù dét i mkel di gamu.

### *I flau di dad to nun yaan*

<sup>21</sup> Na too gamu safdanà di kat satu, du yé ilè i kafèyu di ku Krayst. <sup>22</sup> Gamu dad libun nun yaan, fdanàyu i ktoy di yaanyu salngad i kafdanàyu di Amuto, Dyisas Krayst. <sup>23</sup> Du i lagi, kenen ulu i yaanan salngad ku Krayst, ulu i dad to ftoo, dunan i lawehan, na kenen falwà dale. <sup>24</sup> Na nè kafdanà i dad to ftoo di ku Krayst, salngad ayé moon kafdanà i dad libun di yaanla fagu di kdee dad nimòla.

<sup>25</sup> Na gamu dad lagi nun yaan, kandoyu i yaanyu salngad di kakdo Krayst i dad to ftoo di kenen du blén i kton di fati mdà di gito. <sup>26</sup> Yé duenan fafati

---

\* **5:19** 5:19 Dunan i libru guglam i dad lingag dmayen di Dwata.

du yé dalanan tamluh gito di kafngen damyoh gito di éél fagu di Tnalùan, <sup>27</sup> du fye too gten i dad to ftoo di kenen, na mlaneb, na landè gumaslento di balù détan. <sup>28</sup> Na salngad ayé, gamu dad lagi, fye ku tooyu kando yaanyu salngad i gamu laweh, du i lagi kamdo i yaanan, ta lêan kando i kenen kto. <sup>29</sup> (Du landè to ku knangan i kton, bay yé nimòan fankaanan, na toon nifat. Na salngad ayé i kifat Krayst di dad to ftoo di kenen. <sup>30</sup> Du i kdeeto slame dad alel laweh Krayst.) <sup>31</sup> Na ani sulat di Tnalù Dwata, manan, “Yé duen i lagi tmagak i màan na yêan, na satnù di yaanan, na i lwe dad to ayé ta mbaling ale satu.” <sup>32</sup> Too mngalam gumtatek i manan ayé, bay yé kaglabatgu dun, dunan i ksasatu Krayst di dad to ftoo di kenen. <sup>33</sup> Bay knèan, kat satu gamu dad lagi, là fakay ku là kandoyu i yaanyu salngad i kakdoyu i ktoy, na gamu dad libun, là fakay ku là nafèyu i yaanyu.

## 6

### *Dad flau di dad ngà na di dad tuala*

<sup>1</sup> Dad ngà, nimenyu i dad tuayu du yé gten nimò i dad ngà ftoo di ku Krayst. <sup>2</sup> Ani uldin di Tnalù Dwata, manan, “Nafèam i màam na yêam.” Di kdee dad uldin, yé i tnanin uldin nun fakang magin dun, du ani manan, <sup>3</sup> “Ku nafèam dad tuam, too fye i knèam, na too tahà i lawilam dini di tah tanà.”

<sup>4</sup> Na gamu dad tua, nangyu nimò gufalbut i dad ngàyu, bay di kebeyu dale, falnauyu na tdòyu ale glalò di katdò i Amuto.

### *I dad flau di dad fasak na di dad amula*

<sup>5</sup> Dad fasak, nimenyu i dad amuyu dini di tah tanà. Nang gamu smumal, bay tooyu ale nafè, na nimòyu i kdee mdà di nawayu, salngad i kimenyu di ku Krayst. <sup>6</sup> Tooyu ale nimen. Na nang lo yé kafdufyu di nimòyu ku tnanulla gamu du ku yé nimòyu, lo yé nusalyu i kdagla gamu. Bay balù ku là teenla gamu, nimòyu i knayè Dwata mdà di nawayu, salngad ku yé gufafasakyu di ku Krayst. <sup>7</sup> Na yé duenam man, too gamu falgad mdà di nawayu du di Amuto i gumimòyu ani, ise ku lo di dad to. <sup>8</sup> Du gadèyu banlé Amuto taden i kdee dad to mdà di dad fye nimòla, balù ku fasak ku demen ise.

<sup>9</sup> Na gamu dad amu, yé fye ku salngad kibòyu i dad fasakyu. Nangyu ale falnikò du gadèyu lo satu sa i Amuyu di langit, na landè to nungulan.

### *I dad klung blé Dwata gito*

<sup>10</sup> Na di gusenán, too gamu fbagal fagu di ksasatuyu di Amu, na di kaltulusan. <sup>11</sup> Sandulêyu lsak i kdee dad klung blé Dwata du fye gfisanyu Satanas di kdee galan kafgaw gamu. <sup>12</sup> Du ise ku yé dademeto sfati i dademeto to, bay yé dademeto sfati i dad ulu i dad sasè tulus, dunan i dad busaw nun glal magot i gukmifuh i banwe ani, na dale gumdà i sasè nimò di tah tanà na di bleng i tanà na i langit. <sup>13</sup> Yé duenam man, sandulêyu lsak i kdee dad klung blé Dwata du fye ku ta kel i bang i kdee sasè, gfisanyu kenen, na gaganyu tadag kel di gusen i kasfati.

<sup>14</sup> Taman, too gamu fatlagad, na fan-gatyu i galingyu, dunan i kaglután, na lê man anit, dunan

i katluh. <sup>15</sup> Na Isakyu talumfà, dunan i kafatlagadyu tamdò i Fye Tulen mlé kasgulê nawa i to gamsalà na i Dwata. <sup>16</sup> Na i kaftooyu di ku Dyisas Krayst, yé klung nagoty du klungyu di dad fanà dminè gal gtì Satanas. <sup>17</sup> Na dnawaty i kagalwà blé Dwata gamu du ani kalù tek ta sukub di uluyu. Na tooyu gnamit i Tnalù Dwata du ani sundang ta blé i Mtiu Tulus di gamu. <sup>18</sup> Na di kdee ayé gine, too gamu dmasal mni tabeng di Dwata. Na balù dét mkel di gamu, too gamu dmasal fagu di kalak i Mtiu Tulus. Na too gamu fgeye, na nang gamu ftakas. Na tooyu dnasal i kdee dad to Dwata. <sup>19</sup> Na lêyu agu beg dnasal du fye di katdògu, banlé Dwata agu glut tdò du fye nun klabègu tmulen i ta fgadèan gablà di Fye Tulen, dunan i là fa tayòan fgadè di munan. <sup>20</sup> Yé duen Dwata mdek do du tdògu i Fye Tulen, na yé duen-gu gablanggù ani. Taman, begyu agu dnasal du fye landè klikògu tmulen dun, du yé gten nimògu.

### *Gusen i surat*

<sup>21</sup> Yé tmulen gamu gablà di kagkahgu na di nimògu dini Tikiku, i satu flanekto too mabtas na gsalig di nimò i Amuto. <sup>22</sup> Taman, ani duen-gu mdek kenen salu déé di gamu du tulenan gamu i kagkahmi dini, na tan-galan i nawayu.

<sup>23</sup> E dad flanekgu, mulà moon i Màto Dwata na i Amuto Dyisas Krayst mlé gamu ktanak, na kalbong nawa, na kaftoo di kenen. <sup>24</sup> Mulà moon banlé Dwata kafye i kdee dad to kambong nawa i Amuto Dyisas Krayst kel di landè sen.

## **I Falami Kasafnè (New Testament) New Testament in Blaan, Koronadal**

copyright © 1995 Wycliffe Bible Translators, Inc.

Language: Koronadal Blaan (Blaan, Koronadal)

Translation by: Wycliffe Bible Translators, Inc.

### **Copyright Information**

© 1995, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Blaan, Koronadal

**© 1995, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

---

PDF generated using Haiola and XeLaTeX on 11 Nov 2022 from source files  
dated 29 Jan 2022  
14bc4c76-f8e3-589b-ae5a-218cf6de169a